

淮海英靈續集

淮海英靈續集

鄉人阮亨輯

王

授

字東楹甘泉人嘉慶庚申副貢生王小村云明經安貧樂道教授生徒登甲乙榜者甚多與張芟堂

明經時稱

兩經師

題阮梅叔臯亭探梅圖

小撥輕舟傍水涯閒情攜榼訪梅花孤峯半隱香仍遠積雪
纔消信豈差翠鳥啁啾前夢覺空林岑寂晚烟斜他年倘趁
尋春約也到西湖飲落霞

謝公墩

一抹殘陽照冷城高墩無恙鎖黃昏踈籬草覆空秋色小徑
苔荒尙屐痕世事有誰遐想得山靈都賴古風存悠然我亦
情無限清磬寒鐘滿寺門

陳

變

字理堂泰州人嘉慶戊午舉人官邳州學正著意圖詩集羣雅集云謝少宰視學江淮目理堂爲郭

景純本元志之流畢制府英才集小序云理堂一官奉
檄十載攫囊什宜登樓景行種非釋其詩每悲其志

說劍

不是袁公術聊從莊叟遊齒牙飛古雪肝膽話清秋鳴自匣
中出言於天外留怪他持寸鐵細碎辨恩讐

老兵

百戰餘生臥草萊戍樓閒聽角聲哀迷離望極平安火慷慨
歌成阿濫堆至竟封侯無骨相何曾廝養不英才記從故李
將軍後夜夜山南射虎回

黃葉

秋老江南木葉稀六朝金粉未全非高峯度日不知處古戍
驚沙相間飛慘澹心情餘畫本蒼涼烟景入荆扉却憐草色
河橋外又逐征塵上客衣

戲馬臺

衣錦何年戲馬迴龍從怪石擁荒臺重陽風雨思高會西楚
山川出霸才浩蕩秋原看鹿走蒼茫戰壘見花開阮生一掬
英雄淚廣武吟成迴自哀

王秋旌明府量任商邱書以誌別

渺渺金堤外迢迢沁水分不歸常送客有夢定逢君草長來
時路余于己酉冬來峯寒別後雲太行應我伴獨立對斜曛

焦

循字里堂江都人嘉慶辛酉舉人吾師初用力于尚

四卷禹貢鄭注釋二卷後精研算學著學筭記十七卷
得李樂城測圓海鏡益古演段兩書與歙縣汪萊元和
李銳講明切究之絕學賴以復興壬戌會試歸卽閉戶
專力學易悟得洞淵丸容之術實通于易乃以數之比
例求易之比例盡屏他務專理此經自名諸書之地爲
尚洞淵丸容數注易室著唯菽樓易學四十卷又著六
經輔疏二十一卷論語通釋一卷孟子正易三十卷道
藏錄五十卷易餘篇錄二十卷書義叢鈔四十卷北湖

小志六卷目訂詩文爲雅藝集二十四卷前集三
卷家訓二卷又有劇說詩餘易話等凡數十卷

登州

車驅千里外地極九州東平朔月痕見當頭斗柄中風聲喧
日夜展氣出青紅欲拜田橫墓淒淒海外風

渡曹娥江

西望錢塘百里遙曹娥江口夜停橈青松鶴立白雲起鐵管
不鳴秋不潮

七里瀨登子陵釣臺

夾岸曉烟開清晨泛棹來嶂隨舟尾合波讓石根回帆影爭
飛鳥灘聲動遠雷一竿千古事惆悵子陵臺

北湖泊平寺

我居湖水南閒行水之隩四面波如烟屈曲遠僧屋巍然一

殿存佛龕飛蝙蝠破垣倚孤墳樓運有漁牧僧亦畏荒寂屬
戶去不復隣農見客來煮水潤枯腹此寺肇自唐此地本平
陸南北爲通途千家聚邦族桑田旣成海坡環兼水複東望
露筋祠烟波隔春木孤帆變社來森森接淮濱吾居咫尺間
踪跡徒鹿鹿爲此汗漫遊湖波洗昏目欲摩壁上碑苔深不
能讀

題阮梅叔珠湖漁隱圖

古者士大夫子弟授田耕耨者不忘賤耕者豈不榮與爲紈
袴兒寧爲輶曲英兄貴弟孱佚識者譏爲僇兄貴弟隱退舉
世稱錚錚非真好漁釣抑豈無宦情方在田野間凜凜時戒
盈處求學業積出願名行成所懷在道義耒耜猶簪纓

番薯吟

定海諸生李與吉製赤貧事母長徒數里外
每食必歸食日必至主人請其飯並不語久之

佳每英區讀裏

楚書卷五

乃曰家貧母食番薯何忍獨食飯也阮學使訪得實表之又給以金始却不肯受爾以歸養母乃感泣而去

母食米兒食薯母心不豫母食薯兒食米兒能不泣涕海水滔滔浪拍天中有斯人行獨賢使君與金謝不受無名得此身之咎使君曰汝勿却姑買市中珍歸爲賢母樂孀生叩首納金去爾眼紛紛淚飛絮

吳廷樽

字履堂甘泉人嘉慶辛酉舉人

題阮仲嘉學亭探梅圖

學亭之麓水之涯有客來探亭畔花嚴雪乍消香尚暗春風先占信無差踏迴孤嶼林烟活夢到羅浮月影斜指日弄珠堪索笑豪情應更賞流霞

程贊皇

字平泉號現公儀徵貢生平泉接客忘魯與江鄭草同有雜菜孟嘗之目

同汪蓮浦刺史李白樓石遠梅雨上舍張老薑布衣暨
舍弟靜軒南溪春泛

雲淨天宇空溪光散朝霧眷此風日佳扁舟延野趣竹深如
有人逕曲疑無路好鳥時一鳴落花不知數與因談笑生景
與幽閒遇山色隔江來青蒼靄烟樹

過王柳村郊居

羨君無事狎樵漁手瀹清泉日著書千樹桃花萬竿竹青山
影裏閉門居

劉台斗

字建騰號星槎世謬子嘉慶己未進士官瑞州銅

鼓營同知星槎爲端臨弟端臨淹通經學爲士林
楷式如錢大昕王鳴盛段玉裁汪中皆推崇之星槎學
有師承兼工韻語各體俱宗唐人力洗餽餉之習既沒
余兄子常生奉其
集乞避因錄之

邗上送諸兄弟北歸昔年此日別汪容甫處

一片離人月年年此渡頭
秋風隨過客落葉上行舟
別夢感今夕歧途憶舊遊
劇憐邅上水不向故鄉流

春泉白雲親舍圖

不行無可養斯語盡吞聲
以我風塵苦知君離別情
倚門千里望長路百憂并
天畔白雲舍年年陔草生

黃鶴樓

昔人乘鶴去千載詞客題詩
又幾年檻外江山自今古
人間崔李定神仙梅花橫笛
無遺響芳草空洲有暮烟
極目鄉關迷楚望眼前春色
培堪憐

贈王九峯

門客淮陰市王孫今獨歸
他時懷舊雨盡日戀斜暉
去路隨芳草還家入翠微
候門多稚子燈火出書帷

題孔竹嶼江深草閣圖

少陵成小築草閣蜀江深雲水方終古乾坤又此亭潮連巴
峽白天劃楚江青地僻多乘興年來幾度經

吳文奎

字環紫號銘初賓應人嘉慶辛酉舉人劉寶楠撰
求集云文奎歿于都遺稿散佚朋友云春雨梅花

人北去秋江孤棹
雁南飛中唐佳句

柳絮

垂楊深處釣人居飄滿寒江雪不如流水桃花春漲後綠莎
青笠雨飛初輕粘蘆被原同絮偶拂綸竿欲誤魚聞檢籊筒
凝望久風光三月轉徐徐

吳

煥

字待軒江都布衣著枕流閣集待軒祭酒苑之元孫

過朱老匏墓

墓久湮沒墓碣爲余所得遂率同人新之

苦吟惟賸一身貧淮海飄零最愴神曾結屠沽爲酒伴不孤

天地著詩人西風落葉山村雨寒食飛花野寺春我拜荒墳
斜照裏殘碑重立剪荆榛

過翠屏洲王柳村村居

傾懷十年久才到翠屏洲柳抱藏書屋花明賣酒樓斯人追
正始選集著千秋獨得賞音妙焦桐費下留

居慎憲

字耕陽甘泉人
嘉慶辛酉舉人

題阮梅叔舉亭探梅圖

芳情索笑水雲涯悄叩山靈瘦削花煖候香來春欲步寒胎
喜破信無差十分詩酒江南贈一幅丹黃竹外斜自有仙風
送遊屐知君氣味挹烟霞

李亨衢

號南柯泰州貢生南阿品誼
端謹海陵諸生奉爲師表

書王柳村種竹軒築後

愛讀右丞集如遊峒水間春回江上柳青入雨中山國史精
華萃貧交性命關所嗟分手易一棹暮潮還

畢貴生

字成之儀徵諸生著小峽山人集成之殺虎歌才氣橫絕獨有千古袁趙見之亦當首肯

袁將軍殺虎歌

將軍殺虎如殺賊至今人感將軍德將軍死後名已亡殺虎
之工人能詳請言靖州殺虎日七虎共敵將軍一虎識將軍
生退志火槍一發震天地將軍身勢如山高利器在手飛輕
鷗連殪四虎餘奔逃州人遠逆山之切請從此逝無過勞將
軍視虎如兒戲詎知虎亦工陰計三虎潛伏前山前歸途豐
草腥風旋一虎突出將軍側卒求火具渾難得空槍所及虎
頭斷回首顧槍空剩半是時已令五虎死殺虎之力可知矣
不殲餘孽固不可况當兩虎分前後空槍復斷若無有不如

棄之張空手奮拳一擊碎虎首血出方知傷左肘嗚呼將軍
身已傷一虎尙在心旁皇我力旣倦彼莫當四目相視天無
光以頭觸虎虎負痛虎挈將軍迸力縱人死虎死一時共將
軍腦裂虎胸洞聞者奔弔各悲慟自顧身輕百姓重噫吁嘻
將軍之勇能殺虎將軍之德空千古歌殘令我想劉琨德化
能教渡河去

揚州新樂府三章

城門土 頌捍患也

兩城一片喧聲起半夜心驚水至矣飛騎更番報險來居民
惑亂城夜開揚州太守仁且賢亟謁大吏籌金錢大吏重太
守安民毋遽走西郊置礮城頭鼓守兵執燈紛三五揭竿照
遠夜堪數水驟來門堵土水不來民安處

伊公來 頌撫氓也

武官揚鞭扶人背不許流民乞城內文官誘人城門開流民怕打不敢來打能使人傷不能使人飽草根和土食幾日生者猶多死者少官府之威在爪牙官羅一鳴人驚倒一官自淮來聞之心骨悲微服撫字無人知升米十錢親給之如此二十日日日俾無遺良有司知爲誰揚州太守公姓伊公名伊秉

寧化人以刑曹出守

杖關役 頌安氓也

小吏不敢輕打人奮拳盍打人必貧況是婦人血被百罪在乞錢身便賤紛紛人共睹睹者空旁皇中有太守心獨傷立拘關役訊其詳關督遣監奴爲言公固善願公薄責之不敢固請免太守爵色不憚坐廳事數關役人有心非木石薄責

汝我不職穉其衣杖一百

夏

震

字春舟泰州人黃小秋云春舟與鄭耳山葉古軒羅夏園諸子聯芸香吟課宮大霜橋極重之子紅

詩
物工

夜泊聞鄰舟琵琶感賦

孤舟夜泊酒初醒到耳哀絃不可聽商婦琵琶司馬淚秋風各自感飄零

劉萃集

字伯邑號斷樵賢應諸生象求集云子伯兄楮園仲兄甫樵皆名諸生不遇早卒伯兄寬厚樂易人

稱長者詩亦
清和高妙

山行卽事

幽花不識名空谷芳心吐誰知山上雲化作前村雨

宿攝山幽居蘭若

明月銜半峯斜光入林屋秋雲不出山爲傍幽人宿

喬

棻

字鄰園寶應諸生著棻華集書屋詩鈔王又村云鄰園與兄景雲并著詩名時稱二喬先後繼歿有

玉折蘭摧之感

訪劉楚楨不值

近水掩荆扉幽人此小生應門無童僕涉目得佳趣凍禽伏
虛檐殘雪明孤樹之子不歸來徒倚斜陽暮

劉彥矩

字硯秋寶應人嘉慶己巳進士官博學

歸樵

朝出採山薪暮歸轉山脊山迴路更幽春去草猶碧衣敝不
禁風鞵軟爭穿石歸步故遲遲佇看江月白

李鍾泗

字續石甘泉人嘉慶辛酉舉人著鶴陰書屋集鍾泗性敏而善記於經深左氏春秋撰規規過一書

抑劉仲杜焦里堂師稱其精妙詳博

將試吳陵別母作

往兒出門時兒行兄相依母顏別兒苦阿兄能慰之茲晨兒
出門母心增傷悲母悲還顧兒猶恐兒心哀兒哀出門去母
悲誰竟期去去兒無語兒心愴以摧出門復入門淚落不可
揮

贈許春卿

飛鳥覽儔匹哀鳴求若何矧余執君手能使負經過詩酒論
交易聰明累性多芳華驚逝水吾道惜蹉跎

翠屏洲詩贈王柳村

良時同棄置掩扉甘守拙夙聞輞川遊羨君意孤子浮家江
上村翠屏近如列初疑路岑寂數里幾周折探奇久忘遠歸

剩一輪月

張

鏐

字子貞號老薑江都人布衣著求嘗集羣雅集云
吳兆熊捉鼻苦吟雖貴游雜坐竟日誦咏不知有

人老盡以布衣馳聲淮海間而性情孤峭殆其倫也珠
湖草堂筆談云老薑負性冷峭最喜言詩石廉訪取堂
以方子雲余秋農王柳村謝佩禾凌芝泉諸君詩合刻
之江淮六家詩選陳雲伯令江都舉君與柳村列名薦
贖皆辭不就

丹陽道中

已至丹陽界扁舟曉色間得風帆似馬夾水岸如山野鳥依
籬住孤雲傍客間時逢人荷擔知是趁墟還

蜀岡探梅

我來問消息春已滿平岡一塢積成雪四山都是香心惟向
泉石骨自鍊冰霜待把殘英掃歸家當雀糧

落花

花落竟何賴滿園惟亂紅不須感漂泊只合怨東風昨日蝶
猶至一年春已空有人獨無語腸斷畫樓中

聞蟬

秋色杳無際因風來暮蟬忽驚山閣夢不斷夕陽天得意始
高唱發聲惟自然暗垂牆角下幽怨似相憐

禽言

脫却布褲脫却布褲布褲破時可重作一層棉兩重布衣不
經新何由得故

姑惡姑惡朝在深山暮叢薄今日空啼冤昔時妾意錯妾若
孝姑姑不惡

同汪蓮浦刺史石遠梅李白樓兩上舍程平泉文學暨
定甫編修翠屏洲南溪春泛

欲窮桃花源盪舟信溪風稍進意已愜旣深與無窮溪迴路
疑盡岸轉舟忽通濃花媚春姿搖漾輕波紅斜陽入深林花

光欲浮空倚舷動遐矚人在桃花中幽尋心未疲至樂誰能
同誓將屏家累小築隣溪翁歸橈愴予懷高吟一推篷暮色
蒼然來回首烟濛濛

張遵路

字斯平號韻
堂寶應人

九日

秋色重陽老寒聲落翠微黃花三徑瘦紅葉萬山肥
飈館霜猶舊文峯曲盡非可堪青鬢改動與世相違

張紹先

字念子號支
本寶應諸生

種竹

此君移得影參差客裡王猷慰所思歌檻却愁風動後傍籬
最愛雨來時濃陰匝石遮三徑淺碧臨首寫一枝明日驚雷
新笋出駐龍棲鳳漫相期

張迦彭

字繼發號菊潭寶應人

秋夜

迢遞深深夜銀河淡欲橫月明疎竹影風急暮秋聲濁酒樽前盡輕寒戶外生愁思不能寐獨聽巷南更

仲振履

字雲江號柘庵泰州人嘉慶進士官南海知縣著義舉靡不殫心竭力躬于有成非獨善其身者比也今粵東多遺澤

題程禹山南歸集

遊興亦已倦征人胡不歸風霜十年飽骨月一門饑零落匣中劍闌珊身上衣應知憔悴伴含淚下鳴機

寄陳耳庵

前過子雲宅見君山在書窮愁託豪素歲月老征車命以文章薄交因離別疎題詩相問訊旅况近何如

薛鳳翔

字凌干號潛庵甘泉邵伯鎮人嘉慶乙丑欽賜檢討

與黃思白

一見傾肝膽連宵慰旅愁君行同泛梗我跡亦浮鷗客路又
芳草風塵剩白頭何時買歸棹明月醉揚州

季耀南

字壽昌號雲崖江都監生著雙峯閣集雲崖詩癡食唐賢下逮信陽四真諸公與繆香山李旭齋黃秋谷爲吟侶五言工整亦老蒼匹也秦小峴司寇過尚江亭讀其詩亟稱之賦二絕以贈

與卞孚升

萃文別後作

到來無一語別後最思君孤棹響寒雨秋山入暮雲違鄉非
我願落葉更愁聞回首滄江隔應憐歧路分

卽事寄黃秋谷

至被參軍

春氣已消簾外雪東風初綠竹間苔酒邊遣興聞啼鳥雨後
驚心問落梅獨客淒涼憑試劍半生潦倒幾啣杯遙思邗上

淮海英靈續集

東集

卷五

十一

聯吟輩羨爾參軍作賦才

同佟省齋明府登邗上南城歸飲署齋醉後作

如此烟花地登臨動客愁雲開大江迴楓落萬山秋節序催
霜鬢鄉山入郡樓使君具清興醉我典貂裘

登金山塔同卞渠眉

塔勢臨無地濤聲寒在空磬聞飛鳥上人出白雲中作客嗟
蓬鬢驚心問塞鴻久不符胡眉峯消息江山有如此千載想蘇公

悼石遠梅

愁思鬱江雲江空冷雁羣病中消息斷別後死生分白雀悲
秋夜丹楓慘夕曛多情石湖月偏照故人墳

同洪稚存月波臺看潮

客自荷戈至焦岩訪舊游詩經關塞壯潮捲海門秋坐月動

清酌隔江含遠愁故人葭莢外應共倚高樓

晚過竹西亭

溪頭重問釣魚磯殘照秋風上客衣惆悵竹西歌吹處芙蓉
零落酒人稀

金陵道中柬蔡文芷衫

泉聲千樹落蟲語萬家秋遠火明山谷繁星歷戍樓家無三
畝宅胸有百年憂何事秦淮月偏來照白頭

聽吳山人土伯彈琴

正聲原太古遠韻遶霜天寒月澄幽樹空山流暗泉此時有
高士華髮弄朱絃令我情無限如逢海上仙

虹橋送春

歲歲年年有暮春不關離別已傷神勸君且盡尊前酒明日

虹橋送遠人

懷友

相見傾肝膽相憐各異鄉
邗溝揮手去皖水極天長
昔別花如雪今看鬢有霜
雲邊書忽至讀罷意蒼茫

孫喬年

字寶田高郵人官刑部主事著尚書古文五經合解

冬日飲丁和庵齋中集唐

況與詩家物色宜不相酬和欲何之
蕭疎桂影移茶具掩映
沙村見酒旗高閣清香生靜境
前溪碧水凍醪時君今獨得
居山樂却是人間久遠期

金

雙

字鼎和高郵諸生著認堂文鈔

舟行望樊社湖

萬頃湖光碧歸帆一道斜
水宜天作岸人藉樹爲家
碍檣知

蘆葉收罾得稻花，笛聲何處起驚醒。隔林鴉

胡廷森

字西琴，江都人。愛才工詩。以秋雁詩得名。絕塞秋霜早，衡陽候雁徂。音書幾時達，伴侶若相呼。風急

飛難定，天高影漸無。金徽如尚奏，不恨旅鳴孤。亨亦有詩云：不負隨陽志，南征霜露寒。楚天書欲破，湘水曲休彈。幾點碧雲寒，一聲紅蓼灘。倚樓詩早就，橫處曉星殘。先生極爲獎勵，因並書之以誌知己之感。

卽事

乞得閒身作散仙，綠藤陰下聳吟肩。爐香欲炷簾纔捲，琴韻初殘茗自煎。衡嶽春風迴北雁，洞庭秋水接蒼烟。舊遊裊觸都如夢，明月當頭幾度圓。

劉

洞字同直，寶應人。

孱陵驛

孱陵小歇暫徘徊，如縷愁思酒一杯。却愛荆南風景早，藤花

二月滿山開。

喬士玉

字子成
寶應人

答友人書

鴻雁西北來遺我一書冊未曾拆君書先問君安適開緘試
吟哦情深意不迫不言長相思但言久睽隔四海浮雲馳千
里明月白嗟我二人心天涯徒脉脉離踪何日并何以生羽
翮

劉玉堂

字式爾號雪
棹寶應人

道中感懷

羸得江山數卷詩歸來只合閉門宜人情冷煖嬰兒覺世路
崎嶇倦客知海國秋風勞遠夢孤舟夜月動離思當時冠劍
方年少比日霜華點鬢絲

孫吉昌

字手香號訥齋錢塘人甘泉籍布衣著訥齋詩存
手香爲名父夢餘先生之子以高士袁竹室爲師

廣文應叔雅大令金振之爲友故
詞旨新雋筆力矯健迥異凡響

楊花篇

渡頭閣雨春雲黑楊花萬點飛無力楊花一去天之涯美人
零落同楊花不願楊花飛入水入水楊花飛不起有人無語
泣空條楊花飛盡風蕭蕭

離家

思家如望歲入歲又離家一棹長淮急東風細雨斜客愁疑
樹色詩思冷梅花想像庭闈裏遙憐道路賒

到家

辛苦半年客崎嶇萬里還笑看遊子面喜上老親顏驛路悲
三峽詩篇壯百蠻何時買黃犢屋角有青山

渡黃

渡口立斜陽新寒透客裳秋風吹草白河氣接天黃鞭笠悲
長道尊鱸憶故鄉臨流還獨笑僕僕爲誰忙

春草

獨對青袍色年年憶故鄉烟痕浮岸活雨氣入簾香出郭逢
寒食登樓盡夕陽謝家詩思冷無夢到池塘

柯橋贈陳鶴亭

一棹柯橋路峯巒抱竹扉山容初識面波色欲沾衣驚瀑作
晴雨空嵐變夕暉結鄰居倘許擬築釣魚磯

客况

頻年浪跡自知非菽水偏教與願違一夜月寒人不寐五更
霜冷雁還飛愁來覓枕真如約夢裏還家抵暫歸南望白雲
重登處線痕密密在征衣

又是

又是輕寒輕暖天海濱風景總凄然
曹騰山色渾如睡飄泊楊花劇可憐
芳草有情留宿雨美人如夢隔春烟
長堤踏遍斜陽路新月無端又上絃

長隄柳

撲面西風撲面塵綠陰濃處駐征輪
多情不解長堤柳青眼年年向路人

黃

理字良南如舉人監生著耕南詩鈔良南尊人紹翼嘗出家藏書籍抄本共七千餘卷送度尊經閣良南又續送三千餘卷加惠士林其功匪細彭文勤爲之記

蘭

菱衣憔悴楚靈均更有何人作佩紉
獨抱幽芳空谷裏自來遲暮不逢春

棉

種傍高原數畝寬
傍人從不當花看
豈知萬朵饒秋色
衣被蒼生到歲寒

葵

未曾容易任人攀
五尺欄干綠蔭閒
自許寸心常向日
不知身在草茅間

菊

年時金盡剩空囊
羨煞秋光滿目黃
誰謂一身原是寄
他人籬下有風霜

金

潤字萼亭高郵人乾隆丁酉舉人著蜚鳴閣詩文集

文游臺

百尺崇臺應列星
鬚蘇歌詠記曾經
平吞麋社千尋碧
遙控

神山一點青名勝幾回增感慨文章何處肅英靈遊人都在
秋風裏時看飛鴻入窈冥

朱成梁

字廉泉泰州人貢生王又村按廉泉到股療父內行可風

東坡先生生日

平生壯氣鬱輪囷如此鬚眉迫絕倫文藻千秋歸學士海天
萬里泣孤臣從知福澤春前夢已了維摩病裏身歲歲空齋
展遺照

余家藏東坡渡海圖

題詩又折嶺梅新

劉與喬

字赤霞號佳峯寶應諸生

郡城過某氏故居

一覺南柯夢已非白雲蒼狗寸心違賣瓜陵上曾調馬羅雀
堂前舊賜緋秋雨蕪原空脫劍西風葛屨漫裁衣朱門盡日
葳蕤鎖梁燕雙雙別處飛

鄒

熊字耳山號際飛泰州人候補按察司經歷著夢園詩鈔詩清邁雄俊與雒舉徐德泉并稱海上作者官節溪廣文目爲鄒徐不誣也錄故舊詩名芸香集錄邑中先輩詩名海陵詩彙詩彙未梓而卒殊可惜也

米貴歎

災祲滿數郡一州豐難支商賈居奇贏載舟無停時腴田粟未刈指粟先酬貲貲重富民喜米貴貧民悲三升百錢易八口半啼饑風雨不出戶東隣又斷炊豐年尙如此歉歲安可爲况復虞飛蝗兼聞高堰危愁饑復愁溺束手徒歎歎願蝗無食禾風平浪不頽遺此田中粟老幼無此離不作哀鴻鳴温飽娛清時

桃花雨

水災後作

苦歲荒心徬徨桃花雨其來哀枵腹呼穹蒼雨一滴粟一粒天將爲爾舒局踏麥有秋稻有收與爾桃花雨爲爾潤田

疇願爾命其須臾留雨淋漓心凄其望者喜饑者啼一日無
一粥三月之後奚暇卜桃花雨來依舊哭

春山

春在隔江峯飛來翠萬重不寒難見骨肯笑若爲容雨洗暮
雲碧烟浮曉黛濃岩栖吾有約幽夢一聲鐘

贈王柳村

不少風塵感相看太瘦生此身無長物江左有清名閱歷變
鬚髮饑寒鍊性情酒闌看短飲猶作不平鳴

喬

煇

字然明
實應人

湯荆垣移居柘溪

顛子居陋巷袁安困積雪貧賤固有命而胡在賢哲吾友亦
貧士茅屋自怡悅移居村墅間渺與人境絕非爲避塵囂厲

此固窮節閉關寡所諧詩書緬遺烈堦前有清音門外無車
轍秋風來空庭叢桂凝華潔

劉

澗字射湖
寶應人

送阮靜庵歸宣城

來是丁年白首歸風前欲別更依依儘教中酒休辭聖最好
迴車是息機高氏亭臺留曲水唐儲光羲有安宜園林見高
使君詩故址在寶應城中涇

河謝公樓閣對斜暉題詩分作園林主千里江湖兩布衣

李

斗字文堂江都布衣著揚州
高勳錄雲臺兄弟而刻之

題阮梅叔臯亭探梅圖

臯亭一水清無涯繫舟就樹樹着花吟香遶屋聊可坐疎籬
夾路殊不差橋外點點青山出望中暗暗曦輪斜我開此圖
見二客二客各自呼烟霞

周

詳字端谷號守堂江都人著爾爾書屋詩稿

雜感

魏文飲偷兒趙宣食饑士所惠固不多報者竟以死感激在人心往往刺骨髓後世用術馭識者以爲耻

古人重投報與言在桃李用以結歡好非所待知己肝膽如可托何如淡若水海枯石可爛寸心終不死

張

蓋號紫峯江都再興洲人布衣齋堂參戎子陳熟之云君學不從俗貧不受辨都天會論有功名教

懷王柳村

之子雙峯隱詩篇四海傳聲能出金石氣欲化雲烟垂柳藏書屋春波泛畫船崑山宗旨在愧殺野狐禪

文元星

字衡夫江都人著種瑤草堂詩鈔衡夫五律清雋與朱二亭友善遺集陳溇堂刻之

仲冬薄暮登彈指閣

淮海英靈續集

庚集卷五

六

閣迥倚寒碧憑欄延夕曛野烟晴戀郭古木冷留雲詩自空中得鐘宜靜裏聞諸天如咫尺裊裊妙香熏

遊焦山

螺旋山徑曲幾折向空盤不雨雲常濕非秋晝亦寒八方風盡納一片月先看正值枇杷熟金丸供飽餐

丁

覽字葦江觀弟諸生著柳芳亭畫識

爲書六家兄藝五畫扇

偶然潑墨雨瀟瀟寫罷幽蘭飲興豪呼僕沽來橋外酒一燈
秋夜讀離騷

黃金

字無般號菊隱一號小秋文暘子著何莫孺小秋妻沒後父母旋相繼沒飄然無家挾詩一策從諸

名土作吳越名山遊戊寅夏欲入粵依宮保兄王小村以盛暑止之焦山書藏中未幾得疾沒柳村謂其謁嚴子陵祠一律全以神行化板爲活嘗爲吳祭酒穀人誦之祭酒爲誰穀諸公益重其詩

古意

妾負絕世姿十年貞不字非樂守閨房適人良不易孤芳祇
自知徒抱區區意羨彼蕙蘭花能邀君子至佩之襲衣襟恥
將顏色媚引領念君子天末空翹企對花妾無言對鏡妾垂
淚

照鏡詞

郎贈妾青銅背偃雙盤龍不照妾愁心祇照妾愁容

謁嚴子陵先生祠

若輔中興成帝業雲臺此亦是功臣客星犯座但漁父天子
視卿還故人誰似先生明出處不逢光武亦沉淪我來肅拜
祠堂下願執魚竿老富春

琴

風逼紙窗急操絃調易哀驚飛江上雁彈落隴頭梅古詞何
人識松聲拂指來太和自元氣一室覺春回

寄懷阮梅叔王柳村兩先生

沈約工詩聞抱病

時梅叔先生抱恙

陶潛耽隱愛居村無多知己疎

晨夕各有離懷繞夢魂掃徑與誰吟落葉論文何日倒芳樽
臨風况聽南飛雁寒月無人獨閉門

題阮梅叔先生珠湖漁隱圖

遠隄一帶綠楊多遠映山光碧似螺清味有誰能領略滿湖
烟雨獨披蓑

沒染湖光欲上衣幾行白鷺貼天飛月明一笛烟波裏網得
銀鱗放棹歸

何

寅

字靜軒號雨堂丹徒籍江都翠屏洲人諸生

懷王柳村

結屋翠屏上與君爲比隣詩尊壇坵大語出性情真種竹見
高節栽梅留古春風驟裁僞體吾欲問迷津

胡

晒字丙舉江都貢
生官清河訓導

歲暮感懷

圻土凝冰歲又闌窮冬景物更凋殘凍雲莽莽侵簷合積雪
深深行路難野水舟橫虛問渡枯桑風急早知寒籠爐獨坐
增愁歎望遠思親意未安

湯之桂

字秋林號雲樵實應
人貢生著雲樵詩鈔

送吳嵐橋往盤山

聞說盤山好君今躡屩登山川橫列鎮風雨弔諸陵松老常
巢雀堂空有定僧遙知攜杖處遲我白雲層

卜履文

字坦叔江都翠屏洲人坦叔爲孚升徵君哲弟學詩于王柳村徵君卒年十六玉樹凋傷吳縣石遠

梅比之康德瞻著餘溪集丹徒于徵君子道刻之

呈蔡芷衫先生

白荻照江水寒樹何森森閑居讀君詩令我思不禁持向雙

峯巔一唱驚孤禽翹首企望之白門山色深

漫興

孤村綠蘆暗天地拓胸襟海色暮潮近山光細雨深對之空

飲酒餘興祇張琴欲慰高堂念文章萬古心

翠屏洲晚望

蒹葭環水國十里晚風清客艇迎秋色溪雲入晚晴白波孤

鳥沒黃葉一燈明况是陶嘉月荷裳露氣輕

病中

江濤流客枕木葉下高城病久不思飯詩成偏近名白雲如
出岫芳草竟無情剩有故人淚孤鴻寄遠征

謂于靜齋

秋海棠

質柔未敢近朝暄玉笛參差憶舊恩吹到花間都是怨莫留
珠淚滴長門

獨愛秋風不愛春輕妝瘦骨媚蕭辰憐卿未解前身誤終化
幽花近美人

西風偏是妬娥眉吹瘦幽姿日又遲直到怨紅隨雨盡知卿
始是不愁時

焦廷琥

字虎玉里堂子諸生讀書頗具慧心知平圓三角

之法雲臺兄嘗令其步籌推筭以驗得數百不失
一詩如積雪爭鳥路涼雨薄人衣寺外鐘聲催早雁渡
頭細影繫斜暉隣戶有欄登斷嶺夕陽如水沒秋葵真
晚唐

風韻

題阮梅叔舅氏珠湖漁隱圖

北湖湖水浮輕舟蒼茫一色如平疇珠湖更在北湖北烟波
萬頃連高郵四圍漁舍匝湖澳結網不異耨與耨櫟柎畝
簞笊簞雪鱗鱗鱗清晨收草堂數椽隔葭葦烟簑雨笠盟沙
鷗先生壯志裕經濟學而後仕學則優會須揚藻立廊廟奚
爲濯足垂綸釣此蓋先生讀書處結廬却在珠湖頭鰕菜小
市遠翳雜琳琅萬卷勤冥搜頭銜不署魚蠻子著述日傍松
滋侯舟車南北幾寒暑欲追往事披圖求烟波釣徒不足擬
漁竿鶴髮誰與謀不然更比陸魯望松陵倡和非其儔敞廬
相望可回溯前年小築雕菰樓撈魚射鴨侶田客畫意未得
荆關留得展此卷並題咏北湖雅迹傳名流必謂先生志漁
隱泥沙曷以埋琳鏐北湖之北達巖社漁莊瓊瑤珠光淨

題雷塘話雨圖有序

嘉慶乙亥仲夏太守伊墨卿來揚與家君會於雷陂阮公樓太守稱數年中家居讀書少有所得思出而仕以驗所學並索家君所著易通釋稿談論良久風雨忽來家君歸作雷塘話雨記梅叔舅氏亦作詩太守和之九月太守卒於揚州客舍舅氏作雷塘話雨圖屬琥題之

嘉慶十年歲乙丑伊君來作揚州守甘雨隨車沃田畝歸去讀書已九年舊日胥吏稱其賢重來話雨雷塘邊所話經濟未展發秋風蕭颯太守歿飄飄旄影江頭月

劉寶篆

字雲書寶應人世謫孫劉寶楠象求集云子最愛從兄雲書詩如捲簾情立倚東風夕陽幾點澆花

雨清辭麗句宛似秦淮海

近月樓暮春卽事

我欲留春春已歸芭蕉葉大柳條肥雕梁社燕將雛出學得
凌風何處飛

昨日醪醑花盡吐惜花蝴蝶紛紛舞捲簾悄立倚東風夕陽
幾點澆花雨

賈啟彪

字相臣號少虎儀徵諸生候補理問

麒麟硯

寶韞玉兮全天真續隸圖兮效雕麟發角端兮曜歲星飛赤
烟兮鍾水精披祥符兮壽貞珉卽墨吉兮宜江君

周

琛字麗南號石齋江都再興洲人職監生君善病工吟年甫三十而卒張恂如爲收錄遺詩屬子刻之句如三月春愁飛絮影五更殘夢落花聲讀之令人魂銷

妾送行

妾送行君帆急相看不斷是春流二月吳江春水碧君開帆
妾努力含淚還君雙綺襦妾自往南君往北

客中感懷

一簾細雨誤清明占斷風光作客情三月春愁飛絮影五更
殘夢落花聲酒逢樂處渾忘醉名到成時轉覺輕自顧年來
驚短髮不堪時事苦沾縈

湖上偕張恂如

一帶隋堤柳昏鴉滿樹屯斷橋無石齒古院有苔痕流水碧
環徑夕陽紅到門有人尋晚棹絃管最銷魂

張承桂

字毓馨號小
山竇應人

送蓮橋叔

每值嚴冬日歸來住數旬忽驚春改後又送遠行人目斷孤
帆影魂消古渡濱離多歡聚少只爲阮家貧

旋

錕字劍亭號三橋江都仙女廟人諸生著作月亭集
王柳村云三橋幼工詩文兼精書畫與周曙峯陳

書農尋幽覓句有
東原逸士之風

題淵明采菊圖

朝辭彭澤令暮發柴桑吟非愛東籬菊聊同高尚心白雲流
曲徑斜景沒遙岑猶是采薇意何須更鼓琴

沈勤植

字學倚高郵人涉獵羣書嘗擬涉江采芙蓉五古句云其心本欲歸借無人可從其祖味登觀察疑

其不類常語且恐不永年卽與海鶴扇一握日爲他日壽數後果成詩讖卒年十六著學情遺詩

贈友

人生苦離別不能去情思情思何其篤已心亦莫知游子還
故鄉嘉會在何時偶記離別言曾與定歸期

秋蘭

秋景何蕭疎駕言尋古道環郭有餘清遙睇多芳艸芝蘭漸
被徑採之記未久傷彼良友心獨處無聚首千里雖睽違同
心訂其後

張

熙

字子興號研山江都五品職員著宜之室小草研山爲秋莊曾孫雲臺兄長女安之夫婿也嘉慶庚

辰巽於粵督節署未幾
殺年十九著粵東劄記

南海早秋

南海五千里今年得快遊一更初落月七夕乍登樓簾外梧
桐雨墻邊薜荔秋故園何太遠書寄在扁舟

鷓鴣

南方冬日氣融和花豸雙雙林外過伴我窗前聽不厭鷓鴣
聲裏落花多

憶十畝園

家園處處足勾留我未經遊已隔秋遙憶邗江千里外二分
明月正當樓

李官伯

逸亭孫周南長子穎悟
過人年十八以痘殤

淮海英靈續集

庚集卷五

小齋卽事

插架書千卷匡居闕古今松風破晨寂蕉雨識秋心傑句驚
新得雄文耐朗吟立言誠不朽莫謂少知音

劉源岷

字巨原賓應人著七略齋詩鈔端臨席文長子句如此時旅思兼離思幾日今年是舊年可憐才氣無雙將空羨他人

取列侯可見一斑

采蓮曲同阮小雲作

采蓮復采蓮五月西湖邊蓮花何濯濯蓮葉何田田湖中采
蓮女日棹木蘭船兩手搖輕槳十指露尖纖低頭折蓮花梗
斷絲復連嗟彼葉上露湛湛何輕圓人生不如蓮絲梗情纏
棉人生不如露與葉相周旋掩袂一長歎清淚滴涓涓

李胸生

字祝其號海峯校式子諸生海峯弱冠負雋才文章華美如春葩詩多刻苦語與丁小峴友善殁年

十三

旅夜

斜月橫窗後若烟薄
衾人抱嫩涼眠平生不解思鄉味
一夜更聲到枕邊

王

衛字仲清號蘆雪江都人諸生仲清爲張芟唐高弟高虞卿云仲清上登後作七律三十首以寫抑鬱憤懣之頃有如泣如洟羅江上水傷心風雨讀離騷傷心我欲浮東海敲手人都聚北邙後果投平山堂下溺死卒年二十九間者哀其志又悲其遇也王又村稱其買書未讀如添債得句旋忘似索逋使隨園主人見之必採入

詩話

上燈後連雨數日兀坐無聊偶用僻韻率成七律詩三十首意複言重語無次第亦長歌代哭之意也 錄四

漫學楊雄著解嘲
狂夫空有志
嚶嚶人言清境同
甘蔗我欲浮生似
苦匏禪寂已成泥
裏絮流光猶聚水中泡
陰陽知有循環理
否卦今當第幾爻

草色初迴戶半扁書窗幾日雨淋鈴忘機未便同鷗鷺急退
還思比鶴鶴白髮有親傷困頓青衫無伴惜伶仃世情冷眼
分明記清濁由來辨渭涇

寸心如鏡豈摸稜住世仍同出世僧和靖佳兒惟白鶴仲翔
弔客有青蠅綠慳未着游山屐力薄難牽繫日繩病裏頭顛
搔更短東風吹亂髮鬚髻

風塵何必炫璆琳貧賤光陰苦自禁太白已難消酒癖士安
祇合號書淫天邊雁影催琴軫壁上龍吟起劍鐔我欲峯頭
發長嘯恐教萬馬一齊瘖

姜

堅

字石芙甘泉人嘉慶己卯進士官編修君偉材頭

抱入詞館旋典試滇南得嘔血疾

上賜參藥

異數也卒年二十八士林惜之

谷阮梅叔同年

千里相思覲面難
秋光倏忽又新寒
雁書南去魚書至
兩地攤書一樣看

一番磨劫一番難
浪說乘風到廣寒
畱得瓊樓真色相
待君海上策蹇看

季雨慶

字廉夫秦興人監生著靜思堂集

由冷泉亭過林雲寺至葭光

一徑入深碧
窮幽到極巔
撥雲開古洞
接竹引流泉
海色窗前動
山光足底連
北高峯不遠
誰解學飛仙

觀賑

大吏無私天地知
及時霖雨起瘡痍
可憐一樣提筐女
不貯蠶桑貯粥糜

卜

賢字渠簡號臥雲儀徵人諸生著應巷集

野飲

春風吹綠野花氣醉人心那更重以酒鶯聲聽滿林鶯聲從
何來濁酒開我襟故人偕童冠邀我集花陰攜樽隨所適興
至各自斟江洲花似海一花一美人醉中顧我笑我與爾同
春那知前日花已爲今日塵萬古偶寓我四時汝暫榮如何
不飲酒空使俗慮繁

夜坐和王柳村

秋老詩情淡庭幽鶴夢宜懷人忘坐久會意檢書遲市道吾
儕恥冰心寒月知從來珍太璞努力布衣時

汪端光

字劍潭號叢睦儀徵人乾隆
辛卯舉人官廣西鎮安府

辛巳二月二十日陳雲伯明府來治江都招諸同人讌

集阮梅叔賦詩以紀其盛同人步韻相酬

碧澗羹嘗一味鮮東風華燭譙春天民沾官澤才三日我誦
公詩已萬篇那有着花尋富貴何勞飲酒學神仙猛思夢雨
春明夜不共殘杯二十年

題阮梅叔明經珠湖漁隱圖

秋水伊人未可逢湖天高隱但從容買魚沽酒尋常有醉倒
黃壚阮嗣宗

赤水丹淵事太豪何如蓑笠澹相遭月明疑見孫莘老小隔
菰蒲說漢皋

王

璩

字應和號柳村晚號柳村農隱孝子元臣孫善士

文仁子江都附監生道光辛巳

制科徵舉孝

廉方正壬午徵舉山林隱逸著種竹軒詩文集徵君家

翠屏洲門對金焦三十後屏兼俗學著述自娛事親課

子足跡罕入城市海內知名士見柳村必詢選樓近况

見余必詢蘆中踪跡益余與柳村交最篤人無弗知時

取唐人詩梅柳渡江相讓論詩源本青蓮少陵尋流於

高叔嗣徐昌穀論文宗法昌黎廬陵沼波于魏冰叔邵

子湘時有專主性靈者君獨辦香沈文愨公選羣雅初
二集六十餘卷法時帳祭酒詩云京口集刊羣雅餅金
購自高麗爲時重如此助余雲臺兄輯皇清碑板
錄二百四十卷江蘇詩徵一百八十三卷書成余撰十
五國風詩俱歸月旦二百年文獻盡入搜羅聯語以贈
居鄉與下徵君字升創同善堂收養孤寡老廢置義田
二百餘畝市屋數十間費用賴以不匱又與講約養正
施棺掩骼諸義舉汪中丞志伊聞之書積善餘慶額以
贈道光癸未江水爲災田廬漂泊君輸多金買小舟煮
糜挨戶分給有以官賑正之者君曰俟賑至民卽以死
矣閱百二十日水始退君偕同志倡捐三千金洲民不
致失所皆君賜也江洲貧苦節孝無力呈請旌揚
君與下字升公呈舉報奉旨旌表者五十餘人後
爲奸人忌累訟三年有勳以勿復舉者君曰有一日未
死身當爲一日刊人事卓報如常生平好善不倦類如
此錄瓜洲志二十卷焦山志二十卷京江耆舊集十三
卷行世昔王氏清芬錄二卷王氏法言三卷王氏卮言
四卷種竹山人記年六卷明世說新語三十二卷菽江
錄八卷遺佚錄八卷儒行錄四卷惜陰筆記四卷蕉窗
日記一卷盟鷗漱筆談三卷農隱劄記四卷種竹軒餘
話四卷文選十四卷文續六卷詩選四卷外二卷名
媛詩話四卷潤故一卷文續六卷詩選四卷外二卷名
軒叢書廿一種嗣君屋暨迺敏從余遊皆許生以叢書
付梓問序于余時稱其孝英靈續集君助余搜羅臣多

丙戌春過道東書屋以挖雅揚風老病真符杜子美辭
徵卻聘高情不讓顧亭林聯語示余見之愕然良久君
果以九月十五日卒年五十
九長孫徵次淑皆穎悟能詩

古斷句

莫道花常好花開有落時莫道花盡落猶復戀殘枝

題石遠梅 鈞出塞詩後

十載孤征處黃沙萬里山雄關看日落匹馬帶雲還塞上悲
秋曲尊前惜別顏只今豪氣在獨臥五湖間

深雲庵

入門不見雲出門雲氣亂回頭何處尋已與紅塵斷

秦淮酒樓放歌同蔡丈芷衫余君秋農

我身飄然如孤月影落金陵古城闕手持鐵笛吹清秋招朋
時醉秦淮樓秦淮潺湲有流水空餘粉黛矜羅綺畫槳中流

分夕陽珠簾四面來花香我歌且謠飛羽觴樓前垂楊慘將
夕何處呼來狂太白高臺不見鳳來遊清淮空憶人吹笛繁
星墜水烟茫茫萬鎗迸走波光赤紛紛此日爭龍門攀旗奪
幟老將存久悲遇合未可恃但識文字俱爲恩吾徒壇坫增
聲價醉後心肝露真假壯士中宵怨別離儒生末路尊風雅
憶昔江湖多舊遊瞬息雲天隔十洲今宵一尊須盡醉別君
歸臥雙峯翠

閨怨寄徐霽虛魚飛

古釵寶髻映簾櫳曉起粧臺興久慵知否妾心怨秋色臨江
不敢種芙蓉

讀遠梅秋懷諸作卻寄

一鞭來往薊門關城抱邊雲萬疊山絕塞談詩憐故友中宵

對月解愁顏酒溫窸帳聽狐泣血滿瑀弓帶虎還不是隻身
行萬里那能奇句重人間

夜飲太白樓

高樓如昔時騷人不復作不有大江山美酒對誰酌起舞神
飛揚月向尊前落人生無百年何事長漂泊逕築糟邱臺豈
必尋靈藥我欲從公遊舉手招黃鶴

秦淮口號

倚檻空傷懷古神白門風景正蕭辰文章防亂真名士患難
憐才只美人畫舫月明吹短笛朱樓花落夢殘春秦淮舊恨
斜陽外垂柳絲絲映水濱

德雲庵早起

絕頂白雲封天風落曉鐘聽泉隨曲磻拄杖過中峯閒鹿林

中臥高僧世外逢難尋千歲藥愁倚六朝松

寄茗香助教

劍光忽紫銚光黑秋聲四壁寒蟹泣把君詩卷見君面英姿
颯爽誰能及一官落拓幾經秋買山賣卻青貂裘天姥雁宕
恣豪遊左拍洪崖右浮邱作詩直與青蓮儔謂予持論爭上
流三揖百拜湖邊樓夢中之語何能求

予與遠梅訪君之前夕君夢香樹峴山二

尚書至其家

懽若少年忘白頭君不見武康徐子宣君不見吳縣

石乘綸作者與君稱三人交予何啻骨肉親憶昔春風同握手
浮雲聚散安能久與君醉別西湖柳吾徒何必空憂勞不
如痛飲歌離騷吁嗟呼不如痛飲歌離騷

獨酌懷洪稚存太史

獨酌空傳鸚鵡杯豪遊長憶鳳凰臺春寒雨雪兼旬至日落

江湖一雁來誰惜黃金囊已盡劇憐白髮坐相催勸君休戀
東山臥 聖主於今正愛才

逢漢上友人

憶汝愁無盡相逢愁更多妻孥隔荆楚顛顛各風波魂斷丁
年曲心傷子夜歌久嗟丹穴鳳難覓玉山禾

焦山

生近焦巖貧亦好江鷗來往共忘機夢魂只愛磯邊住不向
烟波深處飛

柳枝詞

踈地柔條碧化烟五更殘月畫樓前何年江上無楊柳何處
春風不可憐

村居喜吳祭酒穀人至

棲息衡門年復年眼前萬事空茫然但教里化仁讓俗何論
家有桑麻田酒熟卻喜賓客至竹靜不驚雞犬眠悠悠平生
幾知已入門相視俱華顛

內子佩蘭五十生日

裙布荆釵事事宜白頭衡泌共棲遲縱多小病時親織才抱
嬌孫又課兒風雨幸無三月別米鹽都賴一身持卅年好合
關天性除卻毛詩不誦詩

飲花下作

醉臥花間滿身雪醒來酌酒還呼月一年一度見花開一年
一度人傷別離別自年年黑頭倏忽驚華顛好花須得春風

憐

村居感興柬阮梅叔沈六芳

不學嚴陵卽渭濱烟波終古兩垂綸青萍何處報知己白首
中原幾故人門外雙峯爭曉日天涯短笛怨殘春自憐老境
無長策敢詡清詩是逸民

送趙直夫

後會知何日嗟余况白頭疎烟生古埭寒雨入孤舟直爲尋
道去時尊甫客六合縣署非同載酒遊他時明月夜萬里夢滄洲

纂輯江蘇詩徵寄兩粵節署付梓卽柬阮宮保

卻教枯木忽逢春忠孝文章泣鬼神事業不爭千古上窮通
俱是百年人開雕河嶽英靈聚著手雲霞氣象新夢繞羅浮
滄海夕麻姑五色蝶如輪

焦山訪借庵長老

空山瓢笠苦吟身古雪鬚眉出世人此老蛟龍不敢得百年

猿鶴與相親，峯當江海中。閒立名是羲皇以上真，爲掃白雲
留客榻，共垂春水釣魚綸。

除夕同兒子迺正迺敏作

鳥與暮雲歸，梅花香掩扉。一年今夕盡，萬事此心非。瓊島素
書至，時接宋太守芷灣沙雪湖仲雲
江雨明府寄書并詩集數種朱絃古調稀。不貪毛義

檄，恐負老萊衣。

春日曲江亭東阮宮保

一碧是春烟，凭闌思渺然。故人同白傅，好句悟青蓮。樹色一
亭雨，琴聲萬壑泉。不知陶靖節，懷抱託無絃。

宋芷灣太守淮以詩見寄，作此答之。

舉口酌天漿，會登白玉堂。何來雙翠羽，貽我大明璫。地暖先
春色，江深易夕陽。靈均宗法在，猶帶楚蘭香。

春日田家

春花香滿尊春水碧孤村誰識農家意雞豚雜子孫胸還餘
俠氣感不在私恩從來真國士恥入孟嘗門

題潘功甫孝廉西湖秋柳卷子

殘照西風柳萬條畫樓吹笛正魂消近來孝穆飄零甚白髮
蕭疎過六橋

放歌寄吳子喬許季青

我所思兮蓬萊瑤島虛無閒彼美人兮驂鸞馭鳳何時還青
天碧海望無極坐見明鏡凋朱顏幽蘭芳蕙香無比孰使叢
生蕭艾裏空教遲暮怨靈均百年事付東流水我醉放歌歌
轉哀中天明月爲徘徊綠毛仙安在哉丹爐不熱碧桃不開
鶴背簫聲入夢來

老夫嘆

老夫目盲荒江臥入耳繁音愁屬和江東耆舊久凋喪一尊

誰遣愁城破去年左思

杏莊方伯

招我遊西湖六橋柳色秋烟涼

建亭爲表忠烈墓

余與鄭簡香謀建碑亭於張公煌言墓上方伯跋其碑後

管領湖山今

髯蘇喜逢陳裴之

小雲

其人磊落而嶽崎詩如寶劍出匣光陸

離雷電在手風雨馳告我王嘉祿

井叔

年甫二十才何奇詩宗

少陵文昌黎日星萬古垂光輝中心折服無阿私揚州選樓

一握手果如陳子所言非吾欺黃蘆白荻空堂夕大江秋洗

雙峯碧鴻鵠高飛隔雲漢三更愁絕瓜洲笛騷壇健者今誰

如蛙聲紫色誰驅除忠孝之性天所儲力追風雅非拘墟君

不見沈尙書

詩徵閣對酒有作

少時意氣輕湖海窮愁頓令鬚眉改三年風月一詩無半生
朋舊幾人在舉酒酌花花可憐花開花落年復年花不知愁
空自妍古人沒已久衰草閉重泉靈氣之所蘊蓄結爲川嶽
散爲雲烟不有古人今無徵不有今人古莫傳杜少陵李青
蓮風塵飄泊不稱意徒將精力工詩篇光華萬古日月懸今
我吟弄傷老醜蠹簡殘編不離手一代英靈聚戶牖仰天大
笑秋雲飛何如花前日對一盃酒

庚辰八月觀穫稻畢感賦

田家無飾情作苦罕所欲涼風吹短褐又刈中田穀及時率
農夫鷄豚喜相逐飽我午飯香醉我新釀熟豈論貴與賤同
享清平福疇使風雨時疇使衣食足但得租賦完詎來胥吏
辱農隙課兒孫粗糲勝梁肉感恩難報恩中夜吞聲哭

周天石明府招同胡默庵家味蘭子頤集署齋

萬頃波光抱縣衙滿城嵐翠苑山家此閒贈客惟香草

盱眙
產香

草不道相逢又菊花廉吏襟懷比冰雪居民生計足魚蝦凭

闌遙見數行雁對酒頻驚兩鬢華

趙明禮

字宗周號敬齋江都監生

送時菴叔都督征苗

寒雞聲不斷曉月淡烟中健馬嘶金勒將軍控角弓臨歧莫
言別此去慎從戎竚望羽書捷苗疆立大功

湯

中

原名禮五字修耕甘泉監生君年近七旬讀書弗輟與弟若愚履思白首同居怡怡若幼稚時以孝

友稱

春日怡園期謝葆塘不至

日暖花爭飛鶯啼客未歸遲君十日久使我寸心違自覺養

身拙休嗟謀道非，珠湖春水滿同築釣魚磯。

俞由余

字沛晴，號石橋，甘泉監生。君性至孝，卒年八十。

小築初成

背山環樹面清波，結構茆齋掩薜蘿。三徑漫徵花作侶，一樽聊借鳥當歌。不緣車馬趨迎候，敢抱琴書費琢磨。最是曉來初睡起，隔林紅日映窗多。

王

字卜祺，號曉庭。一號北溪，通州廩貢生。官東臺教諭。著晴香閣詩文集八卷。

清江喜晤宋六雨

官冷腸偏熱，衝寒爲我來。他鄉驚執手，孤艇共銜杯。款語三更密，新詩一卷開。別離在明發，曉漏莫相催。

歸田雜興

蹉跎逾半世，荏苒已成翁。短鬢侵霜白，頽顏得酒紅。凋雲思舊雨，披豁對東風。無限悲歡事，今都一掃空。

聞蟲

秋深移近臥牀前唧唧聲疑到枕邊好是東海風雨夜擾擾
鄉思不成眠

馮夔友

字竹林號東圃通州廩貢生官山陽教諭著東圃偶存詩文集

上巳日集辛夷館兼送胡印浦入都卽次留別元韻

踏青江頭春色暮落花飛絮和春住有客情傷南浦波言將
去赴金臺路那堪判袂遽孤征且探曲水崇山趣滿酌霞觴
酒數巡聊爲行人祖道具驪駒唱徹又陽關臨岐贈答多留
句丹青妙手煩曹吳良辰樂事存縑素雅集蘭亭入畫圖相
逢樂廣披雲霧鄴中七子數還符裾屐鶯花歸指顧人生誰
能無別離神交自不違跬步況復傳神阿堵中鸚鵡相從常
愛慕清風朗月同流連昔人枉作相思賦

王思濬

字璞山通州貢生著評餘吟草

擬李願琴歌

對酒當歌日之夕橫琴我亦海上客手揮目送羣鴻飛一彈
月白風吹衣也縱豪遊趁月輝峯青不滅吟湘妃欲洗人間
箏笛耳人間漫說知音稀奏我絲桐超粟里指與物化悟太
始

題許忠愍殉節詩後

無復南遷間道奔但明親訓報君恩兵符恨未軍中握客計
空教座上論練尾無情懸一死家書有淚灑千言孤忠第一
稱江北訪得遺編吏部門

謁岳忠武祠

山猶易撼軍難撼唾手燕雲十載功未抵府中借痛飲都驚
旗上寫精忠金牌召速寬三字玉輦還仍望兩宮風捲靈旛
柴市口深林戰血舊埋紅

馮穎賢

字星聚一字箕仲號希齋通
州貢生著虛白齋詩文稿

喜晤朱石甫

賦罷停雲酒滿樽久挾斟酌詠寒溫曉鐘香茗僧開寺疎柳
斜陽客到門百里塞鴻紫別緒一篙春水慰吟魂相逢莫唱
驪駒曲擬作平原仔細論

春陰

不覺春歸去子規飛滿林綠肥初笋嫩紅碎落花深墨瀋侵
窗曉茶煙拂樹陰郊原望縣雨培植見天心

題淵明待酒圖爲楚橋丈題

佳節動幽懷黃花對白叟對面不相娛寂寞過重九撫彼無
絃琴同此樽中酒絃外有遺音酒盡樽何有人生貴行樂況
復辭五斗烏帽本不榮葛巾亦良醜豈無平生歡願言爲君
壽寄語莫傍徨高風有太守

客中遇黃楚橋夜語

今夕知何夕，襟此歲已殘。異鄉逢故舊，佳興肯闌珊。得句和春盞，挑燈耐暮寒。但傾三爵飲，莫問五辛盤。